

Selasa, 5 Mei 2020 | 3:33pm

COVID-19: 259 kertas siasatan berita palsu dibuka

Oleh Mohd Iskandar Ibrahim dan Farah Marshita Abdul Patah
bhnews@bh.com.my

KUALA LUMPUR: Polis dan Suruhanjaya Komunikasi dan Multimedia (SKMM) membuka 259 kertas siasatan membabitkan berita palsu berkaitan COVID-19.

Menteri Kanan (Keselamatan), Datuk Seri Ismail Sabri Yaakob, berkata daripada jumlah itu, 179 daripadanya masih dalam siasatan, 26 kes sudah didakwa di mahkamah, 11 diberikan notis amaran dan 15 mengaku bersalah.

"Melalui Pasukan Respon Pantas (PRP) Kementerian Komunikasi dan Multimedia, sehingga kini sebanyak 255 penafian dan penjelasan mengenai berita palsu diperjelaskan kepada orang ramai oleh PRP.

"Justeru, orang ramai boleh menyalurkan maklumat kepada PRP di talian 03-8911 5103 atau layari www.sebenarnya.my untuk menyemak kesahihan berita," katanya pada sidang media yang disiarkan secara langsung hari ini.

Dalam perkembangan berkaitan, Ismail Sabri berkata, orang ramai dinasihatkan supaya tidak bimbang dengan bekalan makanan dan keperluan harian sepanjang Ramadan ini.

"Penguat kuasa Kementerian Perdagangan Dalam Negeri dan Hal Ehwal Pengguna (KPDNHEP) membuat pemantauan harian 25 jenis bekalan di 977 premis perniagaan termasuk peruncit (751), pemborong (196) dan pengilang (30).

"Secara keseluruhan bekalan barangan keperluan mencukupi dan mampu menampung keperluan dalam negara yang berterusan dan ia mudah diperoleh," katanya.



Menteri Kanan (Keselamatan), Datuk Seri Ismail Sabri Yaakob ketika sidang media perkembangan Perintah Kawalan Pergerakan (PKP) di bangunan Perdana Putra hari ini. - Foto BERNAMA

<https://www.bharian.com.my/berita/nasional/2020/05/685487/covid-19-259-kertas-siasatan-berita-palsu-dibuka>